

allannguutissatut siunnersuut

uunga

Uunga siunnersuut: Nunaoil A/S pillugu Inatsisartut inatsisaat nr. xx ulloq xx qaammat 2009-meersoq

Siunnersuutip aappassaaneerneqarnissaanut Naalakkersuisunit saqqummiunneqartoq

Inatsisissatut siunnersuutip taaguutaanut

1. Inatsisissatut siunnersuutip taaguutaa ima oqaasertalerneqassaaq:

”Siunnersuut uunga: Nunaoil A/S pillugu Inatsisartut inatsisaat nr. xx, uu. qqqq 2009-meersoq.”

§ 2-mut

2. § 2, imm. 2 ima oqaasertaqassaaq:

” Imm. 2. Namminersorlutik Oqartussat aktiaateqarluni ingerlatseqatigiiffimmut toqqaannartumik toqqaanngitsumilluunniit tamakkiisumik Namminersorlutik Oqartussanit pigineqartumut inatsisartullu inatsisaanni matumani § 01, imm. 3-4, kiisalu § 3 malillugit siulersuisunut pisortanullu minnerpaamik assinginik piumasaqaateqarfiusumut Nunaoil A/S-imi aktiaatit kiisalu aktiaatinik nutaanik pissarsisinnaaneq tamakkiisumik ilaannakortumilluunniit tunniussinnaavaat.”

Paragraffit nutaat

3. § 2 kingorna paragraffitut nutaatut ilanngunneqassapput:

” § 01. Ingerlatseqatigiiffiup ataatsimeersuarnerani ukiunut marlunnut atuuttussamik siulersuisunut ilaasortassanik tallimanik qinigaaqqissinnaasunik qinersisoqartassaaq, taamaattorli § 4 takuuk.

Imm. 2. Naalagaaffik, naalagaaffiup Namminersorlutik Oqartussanut tapiissutaasa nul koruuninut annikillisinneqarnissaasa tungaanut, siulersuisunut ilaasortassamik ataatsimik toqqaasinnaavoq. Periarfissaq tamanna naalagaaffiup atorpagu ataatsimeersuarnermi siulersuisunut ilaasortassanik sisamaannarnik qinersisoqassaaq.

Imm. 3. Ikummatissanik ujarlerneq iluaquteqarniarnerlu eqqarsaatigalugit inatsisitigut, aningaasaqarniarnikkut inuussutissarsiornikkullu pissutsit pillugit qaffasissumik uppersaatalimmik ilisimasaqarneq siulersuisut katitigaaneranni takuneqarsinnaassaaq.

Imm. 4. Siulersuisunut ilaasortaq Inatsisartunut imaluunniit Naalakkersuisunut ilaasortaasinnaangilaq.

§ 02. Siulersuisunut ilaasortaq ataatsimeersuarnermi qinerneqartoq tunuarpat piffissap qinigaaffiup sinneranut ilassutaasumik siulersuisunut qinersinissaq siunertaralugu Naalackersuisut immikkut ittumik ataatsimeersuarnissamut ataatsimiigiaqqusissapput.

Imm. 2. Tamanna aamma atuuppoq Naalackersuisut ilisimalerpassuk siulersuisunut ilaasortaq ataatsimeersuarnermi qinerneqartoq,

- 1) akiliisinnaajunnaartutut nalunaarutigineqarsimasoq,
- 2) iliuseqarsimasoq pineqartup siulersuisuni ilaasortaaginnarnissaanik ataqqinassuseerutsitsisumik, imaluunniit
- 3) sivisuumik napparsimanini allatulluunniit sanngiillinini pissutigalugit siulersuisuni ilaasortatut suliassaminik isumaginnissinnaajunnaarsimappat, imaluunniit erseqqissumik piukkunnarunnaarsimappat.

§ 03. Pisortassatut taamaallaat atorfinitsinneqarsinnaapput inuit akileraartarnermut inatsimmik sakkortunerusumik unioqqutitsisimasutut eqqartuunneqarsimanngitsut imaluunniit aningaasanik pinerluuteqarneq nakuusernerluunniit pillugit pinerluttulerinermik inatsimmi aalajangersakkanik unioqqutitsinermut eqqartuunneqarsimanngitsut. Kiisalu inuit minnerpaamik siulersuisunut qaffasissuserititanut nallersuuttumik qaffasissusilimmik suliatigut piginnaaneqarluartutut uppenarsaaserneqarsinnaasut kisimik atorfinitsinneqarsinnaapput, tak. § 01, imm. 3.”

§ 3-mut

4. § 3 ima oqaasertaqassaaq:

” **§ 3.** Ingerlatseqatigiiffiup ukiumoortumik nalunaarusiaa akuerisaasoq Inatsisartut ataatsimiititaliaannut ilisimatitsissutitut Naalackersuisut nassiutissavaat.

Imm. 2. Ingerlatseqatigiiffiup ukiup siuliani sammisarsimasani pillugit ukiumut ataasiartumik ingerlatseqatigiiffik nassuiaammik sularinnittassaaq kiisalu ukiumut tulliuuttumut siunissamullu ungasinnerusumut sammisassatut pilersaarutit kiisalu tamakkunannga aningaasalersuinissanut pilersaarutit pillugit nassuiaateqartassalluni. Nassuiaat ingerlatseqatigiiffimmik aqutsilluarnissaq pillugu ingerlatseqatigiiffiup politikkaa pillugu paasissutissanik imaqassaaq. Nassuiaat ukiumoortumik nalunaarusiaq ilanngullugu Naalackersuisut nassiuttassavaat imm. 1-imi eqqaaneqartoq malillugu.

Imm. 3. Tamakku saniatigut ingerlatseqatigiiffiup Naalackersuisut aqutigalugit Inatsisartut ataatsimiititaliatut pilersitaanut ingerlatseqatigiiffimmi iliuserisimasat ilisimatitsissutigisassavai, inuiaqatigiinni annertuumik pingaaruteqartutut isumaqarfigineqartut imaluunniit ima sunniuteqassappata ingerlatseqatigiiffiup sammisaani aqqissuussinikkut annertuumik allannguuteqartitsinernik kinguneqartussatut isumaqarfigineqarlutik. Ilisimatitsissut ataatsimiititaliamut nassiunneqassaaq paasissutissanik Naalackersuisut tigusinerata kingorna ullut 14-it qaangiutsinnagit.

Imm. 4. Suliassani imm. 2-mut 3-mullu ilaatinneqartuni Naalackersuisut aalajangersinnaavaat ilisimatitsineq tamatumaluunniit ilai isertuussassatut isigineqassasut. Paasissutissat imm. 2-mi oqaaseqatigiit aappaanni pineqartut kikkunnut tamanut saqqummiunneqarsinnaapput.”

Nassuiaatit nalinginnaasut

Allannguutissatut siunnersuutikkut pingaarnertut siunertarinearpoq ingerlatseqatigiiffiup siulersuisuinik pisortaanillu toqqaasarnermut tunngaviusunik killiliussanik arlalinnik inatsisartut inatsisaata annertusineqarnissaa.

Tunngaviusumik killiliussatigut taakkunatigut ingerlatseqatigiiffiup aqutsisuisa ataatsimut pisariaqartunik piginnaasaqarnissaannik ingerlatseqatigiiffiup (taamalu aamma piginnittut: Namminersorlutik Oqartussat) soqutigisai naammassiniarparput.

Tamanna aktiaateqarluni ingerlatseqatigiiffimmut suugaluartumulluunniit Namminersorlutik Oqartussanit pigineqartumut tunngavoq, kisiannili immaqa immikkut pingaaruteqarluni ingerlatseqatigiiffinnut il.il. aningaasaqarniarnermik imminut napatittumik ineriartortitsisinnaanermut Namminersorlutik Oqartussat periarfissaat eqqarsaatigalugit aalajangiisuusumik sunniuteqarsinnaasunut.

Tamanna Kalaallit Nunaata Aatsitassarsiornermi Aningaasaateqarfia pillugu inatsisartut inatsisaata Inatsisartunit ilusilersorneqarneranut aalajangiisuulluinnarsimavoq. Taamaalilluni inatsisartut inatsisaannut pineqartumut siunnersuutip suliarineqarnerani Aningaasaqarnermut Ataatsimiititaliamit isumaqatigiittumit allannguutissatut siunnersuuteqartoqarpoq Naalakkersuisunit ilalerneqartumik.

Isiginiagassat taamaattut ilai aamma aktiaateqarluni ingerlatseqatigiiffik Namminersorlutik Oqartussanit pigineqartoq Nunaoil A/S eqqarsaatigalugu pingaarutilimmik inissisimapput.

Killiliussat inatsimmi aalajangersarneqartussatut siunnersuutigineqartut ingerlatseqatigiiffimmut malittareqqusani tapertalerneqarsinnaassapput sanioqqunneqarsinnaanatilli. Ingerlatseqatigiiffimmi aqutsisunik toqqaasarnermut qulliuernerusumik killiliussat inatsisikkut aalajangersarneqarneratigut, ingerlatseqatigiiffik killiliussanik aalaakkaasunik qularnaariffigineqassaaq, taamatullu aamma aatsitassarsiornermut tunngasuni ingerlatseqatigiiffiup tutsuiginartutut ilisimasaqartutullu inissisimaneranik erseqqissaanermut siuarsaanermullu peqataassalluni.

Allannguutissatut siunnersuutikkut taamatuttaaq § 3, imm. 1-ip kalaallisuuani kukkuneq iluarsineqarpoq, soorlu aamma siunnersuutip qulequtaa taaguutitut nutaanut aalajangersarneqarsimasunut naapertuuttunngortinneqartoq. Kiisalu Inatsisartunut ilisimatitsissutaasartuni paasissutissat isertuussassat pillugit aalajangersagaq allanngortinneqarpoq, soorlu aamma aalajangersakkamut tamatumunnga nassuiaatini erseqqissarneqartoq, aalajangersagaq paasitinneqarsinnaatitaaneq pillugu inatsit malillugu suliaasaaq pillugu paasisaqarsinnaatitaanermut periarfissamik killiliinngitsoq.

Allannguutissatut siunnersuut Namminersorlutik Oqartussanut allaffissornikkut aningaasaqarnikkulluunniit kinguneqassanngilaq.

Aalajangersakkanut ataasiakkaanut nassuiaatit

Nr. 1-imut

Inatsisissatut siunnersuutip saqqummiunneqarnerata kingorna aalajangerneqarsimavoq inatsisartut inatsisaannut peqqussutaannullu danskisut taaguutit tassaalissasut ”inatsisartutlov” aamma ”inatsisartutforordning.” Allanguutissatut siunnersuutikkut siunnersuutip danskisuuata taaguutaa tamatumunnga naapertuuttunngortinneqarpoq.

Nr. 2-3-mut

Allanguutissatut siunnersuummi nr. 2-3-imi siunertarineqarpoq Aatsitassarsiornermi aningaasaateqarfimmi Nunaoil A/S-imilu siulersuisunut pisortanullu piumasaqaatit annertunerusumik assersuunneqarsinnaanissaat.

§ 2, imm. 2-mut

Aalajangersakkakut aalajangersarneqarpoq Namminersorlutik Oqartussat aktiaateqarluni ingerlatseqatigiiffimmut toqqaannartumik toqqaannangitsumilluunniit Namminersorlutik Oqartussanit pigineqartumut Nunaoil A/S-imi aktiaatit (kiisalu aktiaatinik nutaanik pissarsisinnaaneq) tunniussinnaagaat. Tamatumanili piumasaqaataavoq ingerlatseqatigiiffik aktianik tunineqartoq minnerpaamik siulersuisunik pisortanillu toqqaasarneq eqqarsaatigalugu piumasaqaatinik Nunaoil A/S-imut atuuttunik piumasaqaateqarfiussasoq, makku eqqarsaatigalugit:

- siulersuisut piginnaasaat
- pisortap piginnaasai, aningaasatigut pisussaaffinnik naammassinnissinnaanera ataqinassusialu.

§ 01, imm. 1-imut

Aalajangersakkami aalajangersarneqarpoq Nunaoil A/S-ip siulersuisui tallimanik ilaasortaqaassasut, ukiut marlukkaarlugit qinerneqartartunik. Aalajangersagaq piffissaq atuuffissaq eqqarsaatigalugu Kalaallit Nunaanni Aatsitassarsiornermi Aningaasaateqarfik pillugu Inatsisartut Inatsisaanni § 11, imm. 2-mut naapertuuppoq.

Naatsorsuutigineqartariaqarpoq Naalakkersuisut siulersuisunut ilaasortat tamarmik imaluunniit ilaat qineqqittassagaat. Taamaalilluni siulersuisut sulineranni allanguuteqanngitsumik ingerlaannarsinnaanissaaq qularnaarneqassasoq.

§ 01, imm. 2-mut

Aalajangersakkakut naalagaaffik siulersuisunut ilaasortanit tallimanit ataatsimik toqqaasinnaatitaavoq. Taamatulli toqqaasinnaatitaaneq taamaallaat atuutissaaq namminersorlutik oqartussat aatsitassarsiornermit isertittagaasa ima annertutigilernissaasa tungaannut namminersorneq pillugu inatsit naapertorlugi naalagaaffik Namminersorlutik Oqartussanut tapiissuteqartarunnaarluni. Aalajangersagaq inatsisissatut missingiummik Naalakkersuisut tusarniaassutigisimasaanniit aallaaveqarpoq.

§ 01, imm. 1-imi atuuffik qinigaaqqissinnaanerlu pillugit malittarisassat siulersuisunut ilasortamut naalagaaffiup toqqagaanut atuutinnigillat. Siulersuisunut ilaasortaq naalagaaffimmit

toqqarneqartoq nammineq siulersuisunit tunuarniuteqanngippat, taamaalillunilu naalagaaffiup nammineq aalajangersinnaavaa siulersuisunut ilaasortaaitani qaqugu taarsissanerlugu.

§ 01, imm. 3-mut

Aalajangersagaq siulersuisut tamarmiusut piginnaasassaannik aalajangersaaviusoq allatut oqaasertalilaarlugu Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaanni § 11, imm. 1, oqaaseqatigiit pingajuannut naapertuuppoq. Pissusissamisoortutulli isigineqarsimangilaq pigisanik nalilinnik aqutsineq aningaasaliisarnerlu pillugit qaffasissumik ilisimasaqarnissamik piunasaqaatip ilanngunneqarnissaa.

Piginnaasaqarnissamik piunasaqaat suliaasaqarfik ingerlatseqatigiiffiup ingerlatsivigisaa pillugu siulersuisut annertuumik misilittagaqarnissaannik ilisimasaqarnissaannillu qularnaarinneqataassaaq.

Aalajangersagaq Naalakkersuisut “Kalaallit Nunaanni pitsaasumik ingerlatseqatigiiffimmik aqutsinermut kaammattuutit”-nut naapertuuppoq, tassani aalajangersarneqarmat siulersuisunut ilaasortassanik toqqaasoqartassasoq inunnik suliasamat uppersarnarsarneqarsinnaasunik piginnaasalinnik, taamatullu aamma siulersuisut katitigaanerisigut qularnaarniarneqartariaqartoq siulersuisut ataatsimut isigalugit ima piginnaasaqassasut suliasaminnik pitsaanerpaamik naammassinnissinnaanerminnut pisariaqartunik.

§ 01, imm. 4-mut

Siulersuisunut ilaasortap Inatsisartunut Naalakkersuisunulluunniit ilaasortaasinnaannginnerinik aalajangersagaq, inatsisissatut missingiummik Naalakkersuisut tusarniaatigisimasaannik aallaaveqarpoq. Aalajangersagaq Kalaallit Nunaata Aatsitassarsiornermi Aningaasaateqarfia pillugu inatsimmi § 12, imm. 2-mut naapertuuppoq.

Naalakkersuisut pisussaaffigaat Namminersorlutik Oqartussat piginnittutut soqutigisaasa isumaginissaat Inatsisartunut naalakkersuinikkut akisussaallutik. Siulersuisuni ilaasortaaneq tunngaviummik soqutigisatigut aporaaffiusinnaavoq Naalakkersuisut (aktiaateqarluni ingerlatseqatigiiffik namminersorlutik oqartussanit pigineqartoq Nunaoil eqqarsaatigalugu) nakkutilliisussatut inissisimanerata, taamatullu aamma Inatsisartut (Naalakkersuisut eqqarsaatigalugit) nakkutilliisussatut inissisimanerata akornanni.

Naalakkersuisut “Kalaallit Nunaanni pitsaasumik ingerlatseqatigiiffimmik aqutsinermut kaammattuutit”-ni kaammattuutigineqarpoq, ingerlatseqatigiiffiit tamakkiisumik ilaannakortumilluunniit namminersorlutik oqartussanit pigineqartut siulersuisuinut atorfilinnik imaluunniit naalakkersuineramik sulialinnik, piffissami pineqartumi nuna tamakkerlugu kommunimiluunniit qinikkatut inissisimasunik qinersisoqartassanngitsoq.

Taamaattorli Nunaoil A/S pillugu Inatsisartut inatsisaata aamma Kalaallit Nunaata Aatsitassarsiornermi Aningaasaateqarfia pillugu Inatsisartut akornanni assersuussisinnaanissaq siunertaralugu ilaasortaasinnaannginnermik aalajangersakkap atorfilinnut kommunalbestyrelsimulluunniit ilaasortanut atuutsinneqannginnissaa toqqarneqarsimavoq. Aalajangersagassarli aporfussanngilaq assersuutigalugu “Kalaallit Nunaanni pitsaasumik ingerlatseqatigiiffimmik aqutsinermut kaammattuutit” naapertorlugit ingerlatseqatigiiffimmut malittareqqusani siulersuisunut ilaasortaasinnaanermut piunasaqaatinik sakkortusisanik aalajangersaasoqarpat.

§ 02, imm. 1-imut

Aalajangersakkakut Naalackersuisut pisussaatinneqarput siulersuisunut ilaasortaq tunuassagaluarpat ilassutaasumik qinersinissaq siunertaralugu immikkut ittumik ataatsimeersuariaqqusinissamut.

Aalajangersakkamut aktiaateqarluni ingerlatseqatigiiffiit pillugit inatsimmi § 50 tunngavigineqarpoq, tassani aalajangersarneqarluni siulersuisunut ilaasortaq qaqugukkulluunniit siulersuisunit tunuarsinnaasoq.

Aalajangersagaq akornutaassanngilaq Nunaoil A/S-imut malittareqqusani aalajangersarneqassagaluarpat ataatsimeersuarnermi sinniisussanik aalajangersimasunik amerlassusilinnik qinersisoqartassasoq, ilaasortanngortartussanik siulersuisunut ilaasortaq atorffimminik isumaginnissinnaajunnaar*allarp*at.

Ingerlatseqatigiiffimmut malittareqqusani aalajangersarneqarsimappat sinniisussamik qinersisoqartassasoq, siulersuisunut ilassutaasumik qinersisoqassatillugu orniginakkajussaaq Naalackersuisut sinniisussat arlaat siulersuisunut ilaasortanngortippassuk.

§ 02, imm. 2

Aalajangersakkakut Naalackersuisut pisussaaffilerneqarput siulersuisunut ilaasortap allamik taarserneqarnissaa siunertaralugu immikkut ittumik ataatsimiigiaqqusisarnissamut, Naalackersuisut ilisimalerpassuk ilaasortaq pineqartoq akiliisinnaajunnaartut suliarineqartoq imaluunniit iliuuseqarsimasoq pineqartup siulersuisuni ilaasortaaginnarnissaanik ataqqinarunnaarsitsisumik. Tamanna aamma atuuppoq ilaasortaq pineqartoq napparsimanini allatulluunniit sanngiillinini pissutigalugit siulersuisuni ilaasortatut atorffimminik ingerlatsisinnaajunnaarpat, imaluunniit paasineqarpat taamatut sulinissaminut qularnanngitsumik piukkunnanngitsoq.

Aalajangersagaq imarisamigut Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaanni § 13, imm. 2-4mut naapertuuppoq. Aalajangersakkakut siulersuisunut ilaasortat – Kalaallit Nunaata Aatsitassarsiornermi Aningaasaateqarfia pillugu inatsisartut inatsisaannisut - pisussaaffilerneqanngillat tunuartarnissaminut aningaasaqarnikkut pisussaaffimminik naammassinnissinnaanissamut, ataqqinassuseqarnissamut suliaqarsinnaassutsimullu inatsimmi piumasagaatit naammassisinnaajunnaarunikkit. Akerlianik aalajangersakkami Naalackersuisut pisussaaffilerneqarput – Naalackersuisut ilisimalerpassuk siulersuisunut ilaasortaq akiliisinnaassuseqarnissamut, ataqqinassuseqarnissamut suliaqarsinnaassutsimullu inatsimmi piumasagaatinik naammassinnissinnaanngitsoq – siulersuisunut ilaasortap pineqartup taarsernissaa siunertaralugu immikkut ittumik ataatsimeersuariaqqusinissamut.

Imm. 2, nr. 1 malillugu pineqartoq akiliisinnaajunnaartut suliarineqalersimappat siulersuisunut ilaasortap taarserneqarnissaa siunertaralugu Naalackersuisut immikkut ittumik ataatsimeersuariaqqusissapput.

Tamanna aamma imm. 2, nr. 2 malillugu atuuppoq siulersuisunut ilaasortaq iliuuseqarsimappat siulersuisuni ilaasortatut issiaannarnissamut ataqqinassuseerulluni.

Aalajangersakkat taakku assingi aningaasaateqarfiit pillugit inatsimmi § 13, imm. 3-mi aamma aningaasaateqarfiit inuussutissarsiornermik ingerlatallit pillugit inatsimmi § 14, imm. 3-mi

nassaassaapput. Naatsorsuutigineqarpoq ataqqinassutsimik naliliisarnermi najoqqutassat aningaasaateqarfiit aningaasaateqarfiillu inuusutissarsiornermik ingerlatallit siulersuisuinut atuuttut malinneqassasut.

Imm. 2, nr. 3 malillugu siulersuisunut ilaasortamik taarsiinissaq siunertaralugu Naalackersuisut immikkut ittumik ataatsimeersuariaqqusisassapput pineqartoq napparsimanini allatigulluunniit sanngiillisimanini pissutigalugu atorfimminik ingerlatsisinnaajunnaarpat. Tamanna nalinginnaasumik assersuutigalugu atuutissaaq pineqartoq ataatsimiinnissamut takkussinnaanngippat imaluunniit silani silagalugu iliuuseqarsinnaanngippat, assersuutigalugu iisartagartornini pissutigalugu.

Tamanna aamma atuuppoq paasineqarpat siulersuisunut ilaasortaq taamatut atorneqarnissamut pisariaqartumik suliassamut atatillugu pikkorissuseqannginnini pissutigalugu piukkunnaateqanngitsut paasineqarpat.

Aalajangersagaq taamaallaat siulersuisunut ilaasortanut ataatsimeersuarnermit qinerneqartunut atuuppoq. Siulersuisunut ilaasortat naalagaaffimmit toqqarneqartut qaqugukkulluunniit naalagaaffimmit taarserneqarsinnaapput, periarfissarlu tamanna atussanerlugu naalagaaffiup nammineq aalajangigassaralugu.

§ 03-mut

Aalajangersakkakut ingerlatseqatigiiffimmi siulersuisut pisortamik/pisortanik atorfinitisissarnerat eqqarsaatigalugu piumasaqaatit assigiinngitsut aalajangersarneqarput. Inuit akileraartarnermik inatsisinik annertuumik unioqquutisissimasutut eqqartuunneqarsimanngitsut imaluunniit pinerluttulerinermik inatsimmi aningaasatigut pinerluuteqarsimaneq persuttaasimanerluunniit pillugit aalajangersakkanik unioqquutisissimasutut eqqartuunneqarsimanngitsut kisimik atorfinitinneqarsinnaassapput. Taamatuttaaq taamaallaat inuit suliassamut tunngatillugu qaffasissumik, minnerpaamillu siulersuisunut ilaasortat piginnaasaattut qaffasitsigisumik, uppersararneqarsinnaasumik piginnaasallit kisimik atorfinitinneqarsinnaassapput.

Aalajangersakkakut inuit minnerpaamik siulersuisut piginnaasaattut qaffasissulinnik suliamut atatillugu attuumassutilinnik piginnaasallit, taamatullu aamma ingerlatseqatigiiffiup ingerlatsinera eqqarsaatigalugu patajaassutsimik tunniusimanermillu ersersitsisinaanermut tunngaviumik ataqqinassuseqarnermik piumasaqaatinik naammassinnissimasut kisimik pisortatut atorfinitinneqarsinnaanissaat qularnaarneqassaaq.

§ 3-mut

Imm. 1-imut

Allannguutissatut siunnersuutikkut § 3, imm. 1-ip kalaallisuuani kukkuneq iluarsineqarpoq.

Imm. 2-mut

Imm. 2-imi aalajangersagaq inatsisissatut siunnersuummut siullermeerinninnermi saqqummiunneqartumut naleqqiullugu allannguuteqanngilaq.

Imm. 3-mut

Allannguutissatut siunnersuutikkut ingerlatseqatigiiffimmi iliuutsit inuiaqatigiinnut annertuumik pingaarutilittut imaluunniit ima pissusillit ingerlatseqatigiiffiup ingerlatsinerata

aaqqissuussaanerani annertuumik allanngortitsisussatut isigineqartut pillugit Naalakkersuisut Inatsisartut ataatsimiititaliaannut ilisimatitsissuteqartussaataitaanerat piffissalerneqarpoq.

Taamatuttaa Naalakkersuisut paasissutissanik tigusaqarneranniit kingusinnerpaamik ullut 14-it qaangiutsinnagit Naalakkersuisut ataatsimiititaliaq ilisimatittassavaat.

Imm. 4-mut

Aalajangersakkap malitsigisaanik Naalakkersuisut (sukumiinerusumik aalajangersakkanik killilerlugu – tamanna pillugu § 3, imm. 2-mut nassuiaatit takukkit) ingerlatseqatigiiffik pillugu ukiumoortumik ingerlaavartumillu nalunaarutaasartut eqqarsaatigalugit Inatsisartut ataatsimiititaliaat nipangiussisussaatisinnaavaat. Nipangiussisussaataitaneq ilisimatitsissummut tamarmiusumut taassumaluunniit ilaannaanut tunngatinneqarsinnaavoq.

Naalakkersuisut Inatsisartunut Inatsisartullu ataatsimiititaliaannut saaffiginnittarnerat pisortat ingerlatsineranni suliat pilugit paasitinneqarsinnaatitaaneq pillugu inatsisartut inatsisaanni paasitinneqarsinnaatitaaneq pillugu malittarisassanut ilaatinneqarput. Taamaalilluni paasissutissat pineqartut inatsisartut inatsisaanni immikkut pineqarnissamik aalajangersakkanut ilaatinneqanngippata Naalakkersuisut pisussaapput suliamik paasisaqarnissamik noqqaassutit naammassineqarnissaannut.

Naatsorsuutigineqartariaqarpoq paasissutissat kikkut tamat paasitinneqarsinnaanerannut ilaatinneqartut eqqarsaatigalugit Inatsisartut ataatsimiititaliaat pineqartoq Naalakkersuisunit nipangiussisimatitsisussaatinneqartassanngitsoq.